

АКАФИСТ СВЯТОЙ РАВНОАПОСТОЛЬНОЙ НИНЕ, ПРОСВЕТИТЕЛЬНИЦЕ ГРУЗИИ

Кондак 1

Избранной служительнице слова Божия и подвигом святых апостол подражательнице, залог благословения от Божия Матере, честный Крест приявшей и во стране Иверстей водрузившей, благодарственная хваления восписуем ти, цевнице духовная, святая равноапостольная Нино. Ты же, яко имущая дерзновение ко Господу, не престай молящися избавити нас от всяких бед и скорбей, да со умилением благодарственно зовем ти: Радуйся, святая равноапостольная Нино, просветительнице Грузии.

Икос 1

Ангела дивна страны Иверския яви тя всея твари Создатель, обрати народы земли сея, сидящая во тьме и сени смертной, от прелести идольския и призвати их во язык свят, в люди обновления. Темже мы, благодаряще Бога, прославляем тя яко просветительницу и молитвенницу нашу и прилежно зовем ти: Радуйся, пречудная избраннице Божественнаго Промысла; радуйся, дивно процветшая розго благочестиваго корене. Радуйся, сосуде благодати преизрядный; радуйся, вместилище благодатных силы. Радуйся, Пресвятая Девы Богородицы верная посланнице; радуйся, прехвальная апостолом подражательнице. Радуйся, во благовестии первозванному Андрею поревновавшая; радуйся, еюже лжа идольская поправа бысть. Радуйся, еюже святая вера насадися; радуйся, еюже нам земным путь к небесем показуется. Радуйся, святая равноапостольная Нино, просветительнице Грузии.

Кондак 2

Видяще исполнение Божественнаго о людех смотраения Отца Небеснаго, Единороднаго Его Сына и Святаго Духа, воздвигшаго пророки и апостолы ко спасительному служению и нашего ради обращения к свету Евангельския истины избравшаго святую равноапостольную Нину, вопием к Богу: Аллилуиа.

Икос 2

Разум Божественный возжелевши уразумети святая Нина, не единожды испытываше от наставницы своея Нианфоры, яже известна быша о Господе Спасителе нашем и Его святом хитоне, наученная же от нея истинными познаниями, восхоте поклонитися вседрагому хитону и месту подвигов святых апостол. Мы же, благоговения к жизни святых Нины исполнению, прославляем ю сице: Радуйся, истины Царствия Божия уразумети имущая; радуйся, от юности Христа возлюбившая. Радуйся, от младости материю своею Сусанною благочестию

наученная; радуйся, отца своего Завулону утешение. Радуйся, святителем Иувеналием в страхе Божии упасенная; радуйся, Божиим словесем обученная. Радуйся, во святем граде Иерусалиме возвращенная; радуйся, течением своим к славе Божией во младости праведных удивившая. Радуйся, земным благом небесная предпочетшая. Радуйся, святая равноапостольная Нино, просветительнице Грузии.

Кондак 3

Сила Вышняго воздвигши тя, святая Нино, любовию благочестия, желанием поклонитися хитону Господню и ревностию апостольскою, постави тя яко светильник лучезарен, да приемлющии от тебе свет Богоразумия взывают к Богу: Аллилуиа.

Икос 3

Имуще святая Нина непоколебимую ревность ко благоугождению Господеви, возгарашеся желанием прийти во страну Иверскую и поклонитися тамо сокровенным святыням. Мы же, видяще в ней таковое святое ревнование, возопиим к ней: Радуйся, измлада суету мира презревшая; радуйся, истинную мудрость возлюбившая. Радуйся, верное сокровище Богомудрия в Божественном учении обретшая; радуйся, возлюбивших суету мира добродетельным житием превозшедшая. Радуйся, на непоколебимем камени заповедей Христовых утвердившаяся; радуйся, преданностию воле Божией Ангелы и человеки удивившая. Радуйся, постом и молитвою плоть свою духови покорившая; радуйся, любовию своею ко храму Божию томужде многи научившая. Радуйся, добротою нрава к служению апостольства уготовившаяся; радуйся, чрез добродетельное житие свое сосудом Духа Святаго соделавшаяся. Радуйся, святая равноапостольная Нино, просветительнице Грузии.

Кондак 4

Бурею житейских страстей смущаеми, недоумеем, како достойно воспевати твое дивное мужество, святая Богоизбранная Нино, не утратила бо ся ее и исполнити хотение свое, еже шествовати о имени Христове во языческий град Рим. Пречистая же Матерь Господа нашего благоизволи дати ти честныма рукама Своима Святый Крест и призвати тя ко благовестию спасения во стране Иверстей всем хотящим взывати Богу: Аллилуиа.

Икос 4

Слышав святитель града Господня Иувеналий, яко Пресвятая Богородица призва тя проповедати слово Божие во жребии Ея, во стране Иверстей, и даровати в видении Крест, егоже ты обвила еси власы своими, нача славити Бога, спасающаго человеки, и звати тебе сице: Радуйся, благодатию Божиею приосененная; радуйся, смирением духа дерзновение ко Господу Иисусу и Пречистой Его Матери приобретающая. Радуйся, обрадованная явлением Богоматере; радуйся,

пресладкая словеса от Божия Матере слышавшая. Радуйся, с Нею яко со другою беседовавшая; радуйся, благоговейно иерусалимскою братиею почтенная. Радуйся, уготование ко просвещению нашему незаходимым светом; радуйся, свеще, Богом возжженная, во еже разгонити мрак нечестия. Радуйся, честный Крест залог твоего преуспeyания во благовестии приимшая. Радуйся, святая равноапостольная Нино, просветительнице Грузии.

Кондак 5

Боготечною звездою явися, святая Нино, возсиявши нам изволением

Пресвятые Владычицы наша Богородицы и просветивши нас благовестием слова Божия. Сию небесную путеводницу, сияющую славою подвигов благочестия и утешающую выну своею помощию всех нас, притекающих к ней с мольбами, ублажающе, наипаче восхвалим Бога, явившаго святую Нину ходатаицею о нас, и возопиим Ему: Аллилуиа.

Икос 5

Видевше Христовы невесты, яже со святою Ниною и Рипсиминою постом и молитвою спасахуся, нечестивая помышления беззаконно-вавшаго Диоклитиана, хотящаго Рипсимию пояти в жену себе и идолослужению научити, вся купно бежаша тайно из идола града Рима во страну Арменскую; таможе преданы бяху смерти повелением язычествовавшаго царя Тивридата. Святую же Нину Господь от сетей Диоклитиана и Тивридата спасе и привеле ю благовестия ради слова Евангельскаго во Иверию. Темже и мы, радуящиеся сему промыслению Божию о спасении людей, восхваляем Божию посланницу, святую Нину, зовуще: Радуйся, пребыванием своим в Риме путь благовестия себе уяснившая; радуйся, несокрушимостию духа и дивным мужеством в служении слова Божия прославившаяся. Радуйся, трудный путь во Иверию безропотно во славу Божию прошедшая; радуйся, благодатию Божиею от руки Диоклитиана и Тивридата избавленная. Радуйся, сущия у гор Триалетских гласом смирения огласившая; радуйся, образом кротости мир в душах утвердившая. Радуйся, вонею благоухания словес Христовых многие облагоухавшая; радуйся, утверждение наше на пути спасения; радуйся, яко тобою сподобляемся благ вечных. Радуйся, святая равноапостольная Нино, просветительнице Грузии.

Кондак 6

Проповедница велия показася святая Нина, трудами бо и болезнями ея во Иверии Церковь Христова насадися, мрак неведения отгнася, свет истины явися, намже, избавленным святою Ниною от тьмы идолослужения, достойно есть зывати ко Господу: Аллилуиа.

Икос 6

Возсия стране Иверстей просвещение истины, егда святая Нина огласи благовестием град Урбниси, отнюдуже мнози хождаху во Грузинский стольный град Мцхет кланяться лживым богом Ормузду и Задену; сих идолов святая Нина молитвами своими сокруши и низпроверже. Темже и мы яко победительницу демонов восхвалим ю сице: Радуйся, всемогущую силу истинного Бога во стране Иверстей первее показавшая; радуйся, силою Всевышняго идола Ормузда поразившая. Радуйся, гордость его мольбами своими посрамившая; радуйся, останками его безсилie злаго духа открывшая. Радуйся, демона Задена и его аггелов поправшая; радуйся, властителей тьмы отгнавшая. Радуйся, безсильное царство их разрушившая; радуйся, бесовский пламень нечестия угасившая. Радуйся, бурным дыханием и огнем небесным служение идолом низпровергшая; радуйся, ревностию своею имя истиннаго Бога во Иверии прославившая. Радуйся, сыновом тьмы свет Евангельский показавшая. Радуйся, святая равноапостольная Нино, просветительнице Грузии.

Кондак 7

Хотя царь Мириан со слуги своими уразумети силу истиннаго Бога, сокрушившаго безсильныя идолы их, с недоумением глаголаше: что убо сие бысть, яко бози наши падоша? Дом же вертоградя царева со Авиафаром, иереем Иудейским, дщерию его Сидониею и иными девами, благоговейно приявшими благовестие святя Нины, познавше Господа Христа, возопиша к Богу: Аллилуиа.

Икос 7

Новая жизнь дадеса сыновом Иверии приятием от Нины слова истины, вси бо от нея крестишася банею водною во очищение свое от грехов и освящение и достойни соделашася приимати от Бога исцеления мольбами сея предстательницы; царь Мириан, благодатию Божию прозрев от слепоты, истиннаго Бога уразуме и Христа исповеда; царица Нана возста от одра болезни, отрок же их от духа злаго свободися, и вси в купели паки бытия возродишася. Сего ради вси народи, видяще таковая, подолгу прославляют память святя Нины, воспевающе ей сице: Радуйся, неверие царя Мириана в веру обратившая; радуйся, верное того исповедание приемшая. Радуйся, томужде от слепоты исцеление подавшая; радуйся, идолом поклонение угасившая. Радуйся, освобождение от языческих заблуждений; радуйся, очищение нравов. Радуйся, избавление от искушений; радуйся, дарование благоденствий требующим. Радуйся, святая равноапостольная Нино, просветительнице Грузии.

Кондак 8

Странное чудо показася нам от Бога, яко Той, по благосердию Своему, страну Иверию содела жребием Богоматере и, в знамение Своего благоволения обитающим в ней, от первых же дний благовествования о спасении людей посла

честный хитон Господа Христа и над хитоном водрузи Живоносный Столп, от негоже и поднесь верующии получают исцеления; еще же и яви в ней дивную и преславную благовестницу святую Нину, и Крест со драгими ея власы ко утверждению святя Своея веры дарова. Сицевая утешения имуще, мы, земнороднии, вознесем умы и сердца своя к горнему Царствию и прославим благодеющего нам Бога, взывающе к Нему немолчно: Аллилуиа.

Икос 8

Вся объята была еси ты, святая Нино, мыслию о горнем и сего ради призвала еси дольних, неведущих Спасителя всех Господа Иисуса Христа, ко общению со наследники Небеснаго Царствия, да и тии уведят величие славы единого истиннаго Пастыря небесе и земли и прославят Его купно с горними жителями единими усты и едином сердцем. Темже и мы, взирающе на ревность твою о спасении нашем, со умилением зовем ти таковая: Радуйся, отвержение дверей крещения; радуйся, наше к небесем приведение. Радуйся, святым крещением Грузии великою радостью святя Ангелы исполнившая; радуйся, царя Мириана к созиданию рукотвореннаго храма Богу Истинному подвигшая. Радуйся, честный Крест от рождий лозных в нем водрузившая; радуйся, залог сей любви своея ко Христу всем чадам Святя Церкви оставившая. Радуйся, с сонмом подвижниц своих ко святому крещению всех призвавшая; радуйся, сынов Иверии от купели восприявшая. Радуйся, многи в разуме просветившая. Радуйся, святая равноапостольная Нино, просветительнице Грузии.

Кондак 9

Всякое естество Небесных Сил радовашеся, егда крещася сыны Иверии; един бо от небожителей во образе дивнаго человека явися и утверди чудотворный столп над ризою Господнею, научая всех со святою Ниною воспевати Богу: Аллилуиа.

Икос 9

Ветии многовещаннии языки своими не возмогут изрещи тебе достойныя хвалы, равноапостольная Нино: славы бо ради Божия и спасения ближних приехала еси от Мцхета Карталинскаго и Кахетинския земли, идеже вся племена дол и высот, от тебе слышавша словеса Божия, прияша спасение. Мы же, исполненнии радости и благодарения за толикую любовь к нам, от всего сердца взываем ти сице: Радуйся, облечение наше багрянницею крещения; радуйся, поточе сладости, напоивый нас водою благочестия. Радуйся, предивная поборнице веры Христовы; радуйся, насаждение на земли рая небеснаго. Радуйся, освобождение наше от рабства греховнаго; радуйся, сокрушение сетей вражиих. Радуйся, посещение злочестия; радуйся, славная победа над неверием. Радуйся, потребление злых обычаев и суеверий; радуйся, сладкозвучная свирель веры. Радуйся, святая равноапостольная Нино, просветительнице Грузии.

Кондак 10

Спасти хотящи от вечныя погибели душу свою и ближних, равноапостольная Нино, ты ревностию поревновала еси о славе Божией и подъяла еси многотрудный подвиг апостольский, темже убо и венцем апостольским украсилася еси от Господа на небесех, идеже со всеми святыми предстоящи с мольбою о нас воспеваеши Ему: Аллилуиа.

Икос 10

Стену нерушимую воздвиге тя Господь, святая Нино, и показа ограждением нашим от всяких бед и источником исцелений нетленное твое тело во стране Кизикийстей, в веси Бодбе, идеже просветила еси ты царицу Софию и народ ея, да вси, предстательством твоим приемлюще от Бога милости, воззовем ти сице: Радуйся, стено и покрове, не крьющийся от нашего притекания; радуйся, готовая помощи ищущим спасения и истиннаго просвещения. Радуйся, неоскудеваемый источниче благословений и милостей Божиих к почитающим тя; радуйся, защитнице наша от погибели и напастей. Радуйся, благочестивым людем верное поможение; радуйся, истинное умирение мятущихся плоти. Радуйся, радование душ наших. Радуйся, святая равноапостольная Нино, просветительнице Грузии.

Кондак 11

Пение всеумиленное принесла еси Пресвятей Троице, святая Нино, умом и делом до конца своя жизнь Триединого Бога возлюбивши. Приими же от прославляющих тя умиленное пение и не презри гласа нашего, к тебе бо в напастех и скорбех прибегаем по Препоблагословенней Богоматери и, на твое предстательство уповающе, зовем Богу: Аллилуиа.

Икос 11

Светоприемная свеща, святая Нино, свет во тьме явльшая, егда преселяшеся от земли на небо, собра верныя чада своя от купели, яко отрасли новосаждения, и от них некия недужныя исцели, и предаде Богу непорочный дух свой. Видяще же блаженную ея кончину, царь Мириан и ближнии его горько плакаху и, со слезами отходныя песни поюще, взываху к ней таковая: Радуйся, небесный Ангеле во образе земнаго человека явивыйся; радуйся, невесто Христова, уневестившая Небесному Жениху Церковь Иверийскую. Радуйся, благая просветительнице наша, в подвизех дневных и ночных течение совершившая; радуйся, неустанная кормительнице, пищею Божественных словес нас питавшая. Радуйся, непорочная голубице, возлетающая от земли в небесныя обители; радуйся, яко тело твое в нетление облечеса. Радуйся, яко святыя мощи твоя благоухания исполнишася; радуйся, яко тех благоуханием мы, чада твоя, ныне наслаждаемся. Радуйся, святая равноапостольная Нино, просветительнице Грузии.

Кондак 12

Благодать, данную ти от Бога, ведуще, по долгу празднуем всечестную память твою, святая равноапостольная Нино, и со умилением сердца притекающе ко образу твоему, честным Крестом украшенному, вседушно просим: сохрани нас в жизни сей в вере право-славней и во всяком благочестии и чистоте, да и в смертном успении нашем обрящемся достойни воспевати Богу: Аллилуиа.

Икос 12

Поюще твое к Богу отшествие, всехвальная Нино, почитаем твой подвиг апостольства, величаем ревность по Бозе, хвалим долготерпение, славим смирение и ублажаем кончину твою, чудеса бо многими по отшествии твоём дивно прославилася еси; о нихже дивящися, вопием ти сице: Радуйся, в сожительство Ангельских чинов и святых любезне приятая; радуйся, собору апостольскому сопричтенная. Радуйся, с лики избранных Божиих в чертог небесный всельшаяся; радуйся, золотая кадила, фимиам молитвы о нас Богу приносящая. Радуйся, лицезрением небесных вечное блаженство вкушающая; радуйся, с равноапостольными Константином и Еленою славимая. Радуйся, народом Грузинским и всеми православными величаемая; радуйся, чудес Христовых сокровище. Радуйся, яко от честнаго Креста, власы твоими повитаго, исцеление душ и телес получаем; радуйся, яко от святых мощей твоих благопотребную помощь обретаем. Радуйся, святая равноапостольная Нино, просветительнице Грузии.

Кондак 13

О преславная и предивная просветительнице страны Иверския, присная молитвеннице наша пред Спасителем Богом и Его Пречистою Материю, святая равноапостольная Нино! Нынешнее приемши приношение наше, умоли Господа Богоприятным твоим ходатайством избавити нас от всякия напасти, бед и скорбей, и сподобити вечных благ на небеси, да с тобою выну взываем Богу: Аллилуиа.

(Этот кондак читается трижды, затем икос 1 и кондак 1)